



ORANJESTAD - Recientemente Partido MEP a lansa Eddy Paris como candidato nobo riba lista di MEP.

Eddy Paris, 47 aña y pa mas di 20 aña el a traha den e sector corporativo, bancario financiero, despues di caba su estudio universitario na Hulanda na aña 1995.

Ta hustamente den su carera profesional, Eddy a bin ta realisa di cerca e falta di disciplina financiero di parti di nos gobierno, particularmente e ultimo añanan, y e consecucionan serio pa nos economia. E situacion financiero economico di nos pais ta sumamente alarmante. Pa e motibo aki, Eddy a dicidi di drenta politica, teniendo e disciplina y integridad rekeri pa hunto cu e team di MEP, haci e cambionan cu ta urgentemente necesario. Den su discurso dilanti un publico sumamente grandi, sr. Eddy a expresa su gratitud

y admiracion pa nos lider sra. Evelyn Werver Croes y a bisa lo siguiente:

“Mi kier tuma e tempo pa gradici tambe un persona cu den mi opinion como pro-

fesional ta un di e “miho nan cu Aruba tin pa ofrece.” Sigur den e temponan dificil y desafionan financiero economico nos dilanti. Un persona sumamente bon prepara

academicamente y profesionalmente. Pero loke ta haci’e mas capacita y fuerte ainda, ta e hecho cu mi ta refiriendo aki na un hende muhe, sra Evelyn Werver Croes”.

Marinus ‘Rien’ Hurkmans candidato nobo di partido POR

ORANJESTAD - Aruba tin su retonan riba tereno social. POR tin e gran placer di introduci un candidato fuerte y cu amplio experiencia pa cu esaki. Marinus ‘Rien’ Hurkmans a nace 57 aña pas na Hulanda.

Su famia semper tabata activo den partido PvdA na Den Bosch y for di chikito Rien semper tabatin interes den mundo politico. Na 1988 el a caba su estudio Psychische Sociale Hulpverlening na Hogeschool Den Bosch. Na Hulanda, Rien tabata constantemente involvi como boluntario na instancianan cu ta duna asistencia social manera Vluchtelingenwerk y SOS Telefonische Hulpdienst.

Rien tin un trayectoria di 33 aña den sector social. Te dia di awe, su pasion a keda pa pone su conocimiento y habilidadnan na servicio di esnan cu un of otro motibo no por yuda nan mes. Na 2001, el a establece su mes hunto cu su casa na Aruba definitivamente y a cuminsa traha como ‘gezinsbegeleider’ na Departamento di Asuntonan Social. Den capacidad aki e tabata traha directamente cu famianan di muchanan cu a wordo manda pa Casa Cuna of Imeldahof, pa drecha e situacion den e hogar y asina percura pa e muchanan por bin bek cas den un ambiente sigur. Na 2004, Rien a wordo puntra pa dirigi Cas pa Hubentud. Den un periodo cortico el a logra cambia henter e maneho eyden na uno cu miho trato y preparacion pa e habitantenan hobennan di e institucion. For di eynan el a sigui pa bira e prome director interino di Centro Orthopedagogico, bayendo bek despues pa Departamento di Asuntonan Social na unda el a traha un biaha mas den ‘gezinsbegeleiding’, pa yega finalmente den e team di trahadonan social di e departamento na 2010.

Mas cu claro, Rien Hurkmans sa kico ta come y bebe pa loke ta asuntonan social y e aña aki su decision a cay pa habiba su conocimiento y experticio den e arena politico via e

plataforma politico di POR, E Forsa Nobo. Tur loke el a mira y experiencia a trece na siguiente puntonan di salida. Segun Rien, tin tres problema cardinal cu clientenan di Sociale Zaken ta lucha cu ne. Na prome lugá, tin un escasez grandi na viviendanan social. FCCA no a tene su mes na su core business, esta traha viviendanan pa e clase trahador. Segun Rien mester bin un cambio na esaki pa asina percura pa un parti grandi y importante di nos poblacion tambe yega na nan propio cas. Na di dos lugá nos grandinan tin cu warda mucho tempo pa haya un lugá den cas di anciano. Na momento aki tin un lista di espera di mas cu 200 hende. Rien Hurkmans kier mira mas espacio den presupuesto di gobierno pa mas cas di anciano, aanleunwoning y subsidio pa asistencia na cas. E di tres problema cardinal ta cu un gran cantidad di hende no tin suficiente entrada pa cumpli cu necesidadnan basico. Esaki ta inclui famianan cu a lo menos ta haya salario minimo. Mas y mas famianan mester depende di asistencia di instancianan caritativo pa por pone algo di come riba mesa. Como trahado social, Rien ta atende mas y mas casonan severo na unda personanan no por paga pa cuminda, awa of coriente y ta haya nan mes pidiendo pa asistencia inmediato. Rien tambe ta mira cu compara cu antes na unda criminalnan tabata sali for di famianan y barionan vulnerabel, mas y mas ta biniendo for di clase media cu awendia tin dificultad di ‘keep up’ den sociedad.

Rien Hurkmans ta haya cu e gobierno aki y e proximo gobierno tin cu reconoce cu pa 60 pa 70 por ciento di Aruba su clase trahado e entrada di cada luna no ta yega. A yega momento pa cuminsa traha riba un proceso cu e meta di no solamente hisa onderstand y salarionan minimo na un manera structural, pero tambe mara e hisamento di sumanan aki pa ley na inflacion. Asina pueblo semper sa riba kico nan por spera y gobierno ta evita cu ta haci politica cu entradanan minimo den nos pais. Dunadonan di

trabou cu no kier warda riba cambio di ley y ta hisa nan salarionan minimo riba nan propio iniciativa mester haya incentivosnan fiscal. Rien Hurkmans tambe kier mira un sistema mas transparente y eficaz na unda un peticion pa bijstand por wordo atendi mas lihe, sin cu mester warda lunanan largo pa motibo di burocracia.

Fuera di esaki, Rien Hurkmans ta haya cu personanan cu ta biba cu un handicap mester haya mas ayudo por biba un bida digno. Na momento aki esnan cu ta haya asistencia financiero ta haya e suma mensual di 950 florin, cual ta mucho tiki pa cualkier persona por biba riba dje. Pa loke ta instancianan caritativo cu den hopi caso ta e unico con cu ta yuda cierto gruponan vulnerabel den nos sociedad, mester bin un sistema den cual nan ta haya asistencia financiero na un manera structural y na midi. Aki no tin lugá pa hunga politica cu e placa cu nan mester haya.

Hecho ta cu e parti financiero ta djis un banda di medaya. Rien Hurkmans ta constata cu famianan tambe mester di asistencia den forma di coaching y conscientisacion. Aunke cu nos ta biba den 2017, emancipacion na Aruba ainda tin un caminda largo pa bay. Ainda ta mira hopi situacionnan familiar na unda e homber di cas no ta tuma su responsabilidad como casa y tata manera mester. Ademas, ta mira hopi caso den cual parehanan cu no ta cla financieramente of emocionalmente ta lanta un famia. Asina muchanan ta nace y ta wordo lanta den hogaran cu un ambiente no optimal, cu tur su consecucionan. Rien Hurkmans ta kere den promove emancipacion ya caba na scol, pa asina promove un cambio den nos cultura den cual e rolnan di mayornan ta mas igual y muchanan por lanta den un hogar mas solido.

Aruba su retonan riba tereno social no ta nada facil. Pero cu Rien Hurkmans den team di E Forsa Nobo, Aruba sigur POR!